

## 每週經課朗誦經文(巴克禮台語漢字)2013/04/07

### 共同經課 - 1 使徒行傳五章二十七節~三十二節

27 導來了，就互in倚佇公會的面前；祭司頭問in，講：28 「阮曾嚴嚴禁恁，莫得用此個名教示人，恁就將恁的教示遍傳佇耶路撒冷，欲用此人的血歸佇阮！」29 彼得及其餘的使徒應講：「順趁上帝卡過頭佇順趁人，是合宜。30 恁所吊佇柴裡來害死的耶穌，咱列祖的上帝已經互伊復活。31 此個耶穌，上帝用家己的正手舉起伊，做人君，做救主，欲將反悔及赦罪賞賜以色列百姓。32 閣阮為著諸個事做干證，上帝所賞賜互順趁伊的人的聖神也做干證。」

### 共同經課 - 2 詩篇一百五十篇

1 恁著謳啫耶和華！著佇上帝的聖所謳啫伊！著佇伊權能的穹蒼謳啫伊！2 著因為伊大權能的行做謳啫伊，照伊美妙的高大謳啫伊！3 著歎哨角謳啫伊，彈瑟彈琴謳啫伊！4 拍鼓跳舞謳啫伊！用絲弦的樂器及歎簫謳啫伊！5 用聲大的鐃鈸謳啫伊！用音高的鐃鈸謳啫伊！6 凡若有喘氣者攏著謳啫耶和華！恁著謳啫耶和華！

### 共同經課 - 3 啟示錄一章四節~八節

4 約翰寄批互亞西亞七個教會。願恁得著恩典、平安！對彼個現在佇啲、早佇啲、將來亦佇啲的，以及對伊座位前七個神，5 閣對耶穌基督就是忠信的干證、死人中頭一個活的、地上諸個王的主宰。伊疼咱，用伊的血解放咱脫離咱的罪，6 互咱做國，做伊的父上帝的祭司。願榮光、權能歸佇伊，到代代。阿們！7 伊坐雲來！眾目矚欲看見伊，連鑿伊的人亦欲看見伊；地上的族攏欲為著伊來啼哭。實在是按呢。阿們！8 主上帝講：「我是阿利法，閣是奧美加，現在佇啲、早佇啲、將來佇啲的，是全能者。」

### 共同經課 - 4 約翰福音二十章十九節~三十一節

19 彼日（就是七日的頭一日）已經暗，學生因為驚猶太人，就佇in所住的所在關門。耶穌到，倚佇中間，給in講：「願恁平安！」20 已經講此個話，就用手及脅下互in看。學生看見主，就歡喜。21 耶穌閣給in講：「願恁平安！我差恁，親像父有差我。」22 已經講此個話，就對in歎氣，講：「恁受聖神！23 恁赦甚麼人的罪，就赦去，留甚麼人的罪，就留啲。」24 有多馬稱做低土馬的，是十二學生的一個；耶穌到的時，伊無相及佇啲。25 其餘的學生就給伊講：「阮諸個已經看見主啦。」若是多馬給in講：「我若無看見伊手中釘的跡，無用我的指頭仔探伊釘的跡，無用我的手探伊的脅下，我決斷毋信。」26 過八日，伊的學生閣再佇厝內，多馬亦佇啲，門已經關。耶穌到，倚佇中央講：「願恁平安！」27 就給多馬講：「伸你的指頭仔來，看我的手；伸你的手，探我的脅下。莫得做毋信的，著做信的！」28 多馬應講：「我的主啊！我的上帝啊！」29 耶穌給伊講：「你因為看見我才信；許個無看見來信的人，有福氣。」30 耶穌佇學生的面前閣有行多多神蹟，無記佇此本冊的。31 獨獨記諸個互恁信耶穌是基督，是上帝的子，信就佇伊的名得著活。